

瑜伽師地論卷第十三

彌勒菩薩說

唐三藏沙門玄奘奉詔譯

本地分中三摩呬多地第六之三

復次如世尊言汝等苾芻當樂空閒勤修觀行。內心安住正奢摩他者謂能遠離臥具貪著或處空閒或坐樹下繫念現前乃至廣說名樂空閒當知此言顯身遠離若能於內九種住心如是名爲內心安住正奢摩他當知此言顯心遠離若樂處空閒便能引發內心安住正奢摩他若內心安住正奢摩他便能引

發毗鉢舍那。若於毗鉢舍那善修習已。卽能引發於諸法中如實覺了。

復次如世尊言汝等苾芻。於三摩地當勤修習無量常委安住正念者。謂先總標於三摩地勤修習已。後以三事別顯修相。無量者。謂四無量。常委者。謂常有所作。及悉所作。故名常委。安住正念者。顯於四念住。安住其心。何故說此三種修相。謂依二種圓滿故。一者世間圓滿。二者出世圓滿。修無量故。便能引發世間圓滿。修正念故。便能引發出世圓滿。常委修故。於此二種速得通達。由此因緣處二中說是故。但說

三種修相。又無量者。顯奢摩他道。住正念者。顯毗鉢舍那道。常委者。顯此二種速趣證道。又無量者。顯趣福德行。住正念者。顯趣涅槃行。常委者。顯趣二種速圓滿行。先於奢摩他善修習已。後與毗鉢舍那方得俱行。修此二種三摩地故。如實覺了所知境界。

復次如世尊言修靜慮者。或有等持善巧。非等至善巧。廣說如經。喎陀南頌。云何等持善巧。謂於空等三三摩地得善巧故。云何非等至善巧。謂於勝處偏處滅盡等至不善巧故。云何等至善巧。非等持善巧。謂於十種偏處等至及無想等至。若入若出俱得善巧。

非於三三摩地。云何俱善巧。謂於彼二俱善巧故。云何俱不善巧。謂於彼二俱不善巧故。如是於先所說等持等至中隨其所應當善建立。又說等持善巧。非等至善巧者。謂於等持名句文身善知差別。非於能入等至諸行狀相差別。云何等至善巧。非等持善巧。謂如有一善知能入隨一等至諸行狀相。亦能現入。而不善知此三摩地名句文身差別之相。亦不能知我已得入如是如是等持差別有諸菩薩雖能得入若百若干諸三摩地。而不了知彼三摩地名句文身亦不能知我已得入如是如是等持差別乃至未從

諸佛所聞。及於已得第一究竟諸菩薩所而得聽聞。或自證得第一究竟。

云何爲住。謂善取能入諸三摩地諸行狀相。善取彼故。隨其所欲能住於定。於三摩地無復退失。如是若住於定。若不退失。二俱名住。云何爲出。謂如有一於能入定諸行狀相。不復思惟於不定地分別體相。所攝定地不同類法。作意思惟。出三摩地。或隨所作因故。或定所作因故。或期所作因故。而出於定。隨所作者。謂修治衣鉢等諸所作業。定所作者。謂飲食便利。承事師長等。諸所作業。期所作者。謂如有一先立期

契。或許爲他當有所作。或復爲欲轉入餘定。由此因緣出三摩地。何等爲行。謂如所緣作種種行而入於三摩地中所有諸行。何等爲狀。謂於諸定臨欲入時。便有此定相狀先起。由此狀故。彼自了知。我於如是如是相定不久當入。或復正入。彼教授師。由此狀故亦了知彼不久當入。如是如是相定。何等爲相。謂二種相。一所緣相。二因緣相。所緣相者。謂分別體。由緣此故能入諸定。因緣相者。謂定資糧。由此因緣能入諸定。謂隨順定教誡教授。積集諸定所行資糧修俱

行欲厭患。有心於亂不亂審諦了知。及不爲他之所逼惱。或人所作。或非人所作。或音聲所作。或功用所作。云何調善。謂若三摩地。猶爲有行之所拘執。如水被持。或爲法性之所拘執。不靜不妙。非安隱道。亦非證得心一趣性。此三摩地不名調善。不隨所樂安隱而住。與此相違。名爲調善。云何猶爲有行拘執。謂由誓願俱行思故。制伏外緣。持心於定。又於作意要由功用方能運轉。不令內心於外流散。故作是說。如水被持。云何法性之所拘執。謂觀下地爲麤法性。觀於上地爲靜法性。寂靜微妙。得安隱道。及能證得心一

趣性。如五聖智三摩地中已略解釋。云何所行。謂三摩地所行境界。由所得定過此已上不能知故。如初靜慮不能觀見第二靜慮。如是根度數取趣度亦不能知。云何引發。謂能略攝廣文句義。及能成辦諸勝功德。云何等愛。謂慚愧愛敬信正思惟正念正知根護戒護及無悔等樂爲最後。由隨樂故心便得定。與此相違名不等愛。云何等愛亦不等愛。謂如有一於慚愧等少分成就。少不成就。謂具慚愧而無愛敬。乃至廣說。云何爲增。謂所得定轉復增長。云何爲減。謂所得定還復退失。云何方便。謂趣彼二道又止舉捨。

當知如前止等相中已具分別。

復次如分別靜慮經言。有靜慮者。卽於興等謂之爲衰。乃至廣說。此中四轉。當知二時顛倒。謂於三摩地若退墮時。若勝進時。趣退及退俱名爲衰。趣勝進道及與勝進俱名爲興。云何應知於三摩地進時顛倒。彼謂我今退失離生喜樂。我今退失勝三摩地。謂靜慮者勤修習故。心趣寂靜隨捨行故。從初靜慮入於第二靜慮近分。然於此事不善了知。於此位中初靜慮地喜樂已過。第二靜慮地中所有喜樂猶未能得。便作是念。我今退失離生喜樂。遂還從彼退攝其心。

當知如是修靜慮者其心顛倒。云何應知於三摩地退時顛倒。謂如有一得初靜慮爲涅槃故積集資糧彼於涅槃已得所修資糧圓滿由此因緣或由功用或復任運起如是想作意現前由如是想作意故於諸色中乃至識中了知如病乃至無我由如是想作意故從此無間因世間定所生喜樂不復現行便作是念我今退失定生利益及所依止遂還從彼退攝其心如是當知修靜慮者於三摩地退失顛倒云何當知於三摩地退失無倒謂如有一得初靜慮便生喜足不求上進唯起愛味由起如是欲俱行想作意

故遂便退失近欲界定彼於此衰能了是衰由此因緣當知無倒又由所得靜慮定故自譽毀他謂我所得此靜慮定非餘能得由起如此欲俱行想作意故所有蓋纏轉增轉厚便從定退彼於此衰能了是衰又以所得靜慮諸定顯示於他爲諸國王及王臣等當供養我從定起已尋思此事由如是欲俱行想作意故所有蓋纏轉增轉厚餘如前說如是當知修靜慮者於三摩地退失無倒第二無倒翻初無倒應知其相此二無倒亦於二時應知其相由依如是倒無倒處安立四轉

復次如分別四檢行定經中。由四種相。檢行一切三摩地等。謂此等持是順退分。乃至此是順決擇分。云何檢行。謂此是劣分。此是勝分。此殊勝分。此最勝分。如其次第。此復云何。謂修定者。從初靜慮還退出已。於諸靜慮不復樂入。亦不思惟此行狀相。然欲俱行諸想作意數數現前。如先所說。從彼起已。隨念愛味。當於爾時修靜慮者。應自檢行我三摩地。今成退劣。又修定者。從初靜慮還退出已。得聞隨順此定教法。謂初靜慮諸行狀相。殷勤懇到。善取其相。令所得定堅住不忘。如是隨念順定法故。成順住分。當於爾時。

應自檢行我三摩地已成其勝。我三摩地已得安住。非退非進。非趣決擇。又靜慮者。從初靜慮還退出已。得聞隨順第二靜慮教授之法。既得聞已。第二靜慮道俱行諸想作意數數現前。當於爾時。應自檢行我三摩地已成殊勝。非退非住。唯是勝進。非趣決擇。又修定者。從初靜慮還退出已。聞苦諦等相應教法。既得聞已。苦諦等俱行諸想作意順決擇分。數數現前。彼於爾時。當自檢行我三摩地已成最勝。非退非住。亦非勝進。然趣決擇。

此諸法。若實若有。都不領受。尚不受想。何況無想。此復云何。謂諸苾芻。於初靜慮。具足安住。由此因緣。厭壞眼色。乃至意法。由厭壞故。威勢暎奪。遂於眼中無有眼想。然有其想。乃至於法。無有法想。然有其想。云何有想。謂於眼等作意思惟。是苦是集。或是病等。彼於諸法不受自相。如是乃至無所有處。此中正說無漏作意。云何名爲不受無想。謂不思惟。一切相故。於盡滅中。思惟寂靜。此中意說離諸相想。名爲無想。又說安住滅盡定者。一切諸想皆不生起。

復次如經中說四種趣道。云何宴坐。於諸法中思惟

簡擇。謂有苾芻。先已證得初靜慮等。而未見諦。由聽正法。及多聞故。而能宴坐。依三摩地。於苦等諦發起現觀。如是行者。依增上心修增上慧。又有苾芻。如實知苦。乃至知道。而未證得初靜慮等。彼便宴坐。思惟諸法。如是行者。依增上慧修增上心。第三行者。名爲俱得奢摩他。毗鉢舍那。雙雜轉故。第四行者。先已證得初靜慮等。未聽正法。未習多聞。後從大師或餘尊所。聞見諦法。或復得聞斷餘結法。由此得入真諦現觀。或復證得阿羅漢果。彼既證得出離所引大善喜悅。由能制伏諸掉舉心。復還宴坐。如是坐已。安心住

於靜慮等至最初趣道引見道故第二第三引修道故第四趣道爲俱引故。

復次如經中說。有四淨勝爲求清淨此最爲勝故名淨勝云何爲淨云何爲勝謂所得所證所引戒等若圓滿若攝受是名爲淨發勤精進未滿令滿是名爲勝云何尸羅圓滿攝受謂若有一雖住具戒亦能守護別解脫律儀而於軌則及所行中未能具足未於小罪深見怖畏此於尸羅未名圓滿若於一切皆悉滿足乃名圓滿如是名爲尸羅圓滿若於長時串修習故便於根門善守而住廣說乃至卽於尸羅攝成

自體自性安住如是名爲尸羅攝受云何三摩地圓滿謂若已得加行究竟果或第四靜慮乃名圓滿於此下位皆未圓滿云何三摩地攝受謂彼所得三摩地等後時清淨又三摩地不爲有行之所拘執乃至廣說云何見圓滿謂聞他音及如理作意故正見得生由此正見雖能知苦乃至知道若未如實猶不得名正見圓滿若能於彼如實了知爾時方名正見圓滿云何見攝受謂於後時諸漏永盡乃至廣說云何解脫圓滿謂若由有學智見解脫貪等未名圓滿若由無學智見得解脫者乃名圓滿云何解脫攝受謂

若行若住。常不退失現法樂住。如是名爲解脫攝受。復次如經言。心清淨行苾芻。於時時間。應正作意思惟五相。乃至廣說方便勤修增上心者。乃得名爲心清淨行。諸惡不善欲等尋思。及親里等所有尋思。皆於此行能爲障礙。略有三種補特伽羅。由輶中上尋思行者。有差別故。初由正思惟所餘相故。令彼尋思不復現行。第二由見尋思深過患故。或復不念不思惟故。令彼尋思不復現行。云何不念及不思惟。由善於內安心等故。第三補特伽羅。非初卽能令彼一切皆不現行。要當方便令尋思行漸漸歇薄。麤既息已。

漸當制伏。若猶未能於尋思路尋思所緣。深生厭怖。當以厭患俱行之心。多思惟力。於彼尋思俱行之心。調練制伏。如是三種補特伽羅分爲五種。

復次盪塵經中佛世尊言。當如陶鍊生金之法。陶鍊其心。乃至廣說。如是等義。云何應知。謂陶鍊生金。略有三種。一除垢陶鍊。二攝受陶鍊。三調柔陶鍊。除垢陶鍊者。謂從金性中漸漸除去麤中細垢。乃至唯有淨金沙在。攝受陶鍊者。謂卽於彼鄭重銷煮調柔陶鍊者。謂銷煮已。更細鍊治瑕隙等穢。如金性內所有生金種性。位中心淨行者。當知亦爾。謂堪能證般涅槃者。

槃者。問從何位名心淨行者。答從得淨信求出家位。此於在家及出家位有麤中細三種垢穢。其在家者由一爲障。不令出家。一不善業。謂常樂安處身語惡行。二邪惡見。謂撥無世間真阿羅漢正行正至。此於已得淨信位前能爲障礙。欲等尋思。障出家者。令其不能心生喜樂。親等尋思。障喜樂者。令其不能恆修善法。由斷彼故。恆修善法。速得圓滿純淨之心。有尋有伺。如淨金沙。是名爲心除垢陶鍊。猶如生金。仍未銷煮。若有復能止息尋思。乃至具足安住第四靜慮。是名爲心攝受陶鍊。由能攝受無尋無伺三摩地故。

猶如生金已被銷煮。若三摩地。不爲有行之所拘執。乃至廣說。是名爲心調柔陶鍊。於神通法。隨其所欲。能轉變故。如彼生金已細鍊治瑕隙等穢。

復次如經言。應於三相作意思惟。乃至廣說應時時間作意思惟奢摩他等差別之相。不應一向爲欲對治沈掉等故。若於止舉未串習者。唯一向修是沈掉相。如此修者。當知住在方便道位。若時時間思惟捨相。如是在於成滿道位。亦由於此一向修故。於緣起法。及聖諦中。不思擇故。心不正定。不盡諸漏。於諸諦中。若未現觀。不能現觀。或已現觀。不得漏盡。初之二

種是三摩地能成辦道。第三一種。依三摩地盡諸漏道。是名略顯此中要義。於時時間作意思惟徧一切故。

復次有四正法攝持聖教。何等爲四。一者遠離。二者修習。三者修果。四者於聖教中無有乖諍。遠離者。謂山林樹下空閒靜室修習者。謂住於彼勤修二法。謂奢摩他毗鉢舍那。云何已習奢摩他。依毗鉢舍那而得解脫。謂如有一先已得初靜慮乃至第四靜慮。彼卽依此三摩地故。如實知苦乃至知道。彼卽依此毗鉢舍那。於見所斷諸煩惱中心得解脫。云何已習毗

鉢舍那。依奢摩他心得解脫。謂如有一如實知苦乃至知道。彼依如是增上慧故。發生靜慮。卽由如是奢摩他故。於修所斷諸煩惱中心得解脫。如是修習奢摩他。毗鉢舍那已。於諸界中而得解脫。見道所斷諸行斷故。名爲斷界。修道所斷諸行斷故。名離欲界。一切有執皆永滅故。名爲滅界。是名修果。於聖教中無乖諍者。所謂大師及諸弟子。若義若句。若文於文句義平等潤洽。互相隨順。非如異道施設見解。種種非一。差別不同。第一句者。所謂前句。若以此句問於初一。卽以此句而問第二。設於初一依蘊而問。復於第

二依餘問者。便不得名與第一句平等潤洽。互相隨順。

本地分中非三摩呬多地第七

已說三摩呬多地。云何非三摩呬多地。當知此地相略有十二種。或有自性不定故。名非定地。謂五識身。或有闕輕安故。名非定地。謂欲界繫諸心心法。彼心法雖復亦有心一境性。然無輕安含潤轉故。不名爲定。或有不發趣故。名非定地。謂受欲者。於諸欲中深生染著。而常受用。或有極散亂故。名非定地。謂初修定者。於妙五欲。心隨流散。或有太略聚故。名非定地。謂初修定者。於內略心惛睡所蔽。或有未證得故。名非定地。謂初修定者。雖無散亂。及以略聚。燒惱其心。然猶未得諸作意故。諸心心法。不名爲定。或有未圓滿故。名非定地。謂雖得作意。然未證得加行究竟及彼果故。不名爲定。或有雜染汙故。名非定地。謂雖證得加行究竟果作意。然爲種種愛味等惑染汙其心。或有不自在故。名非定地。謂雖已得加行究竟果作意。其心亦無煩惱染汙。然於入住出諸定相中。未得自在。未隨所欲。梗澀艱難。或有不清淨故。名非定地。謂雖自在。隨其所欲。無澀無難。然唯修得世間定。

故未能永害煩惱隨眠諸心心法。未名爲定。或有起故。名非定地。謂所得定雖不退失。然出定故。不名爲定。或有退故。名非定地。謂退失所得三摩地故。不名爲定。

本地分中有心無心二地第八第九

已說非三摩耶多地。云何有心地。云何無心地。謂此二地俱由五門應知其相。一地施設建立門。二心亂不亂建立門。三生不生建立門。四方位建立門。五第一義建立門。

地施設建立者。謂五識身相應地意地。有尋有伺地。

無尋唯伺地。此四一向是有心地。無尋無伺地中。除無想定。并無想生及滅盡定。所餘一向是有心地。若無想定。若無想生及滅盡定。是無心地。

心亂不亂建立者。謂四顛倒顛倒其心。名爲亂心。若四顛倒不顛倒心。名不亂心。此中亂心亦名無心。性失壞故。如世間見心狂亂者。便言此人是無心人。由狂亂心失本性故。於此門中諸倒亂心。名無心地。若不亂心。名有心地。

生不生建立者。八因緣故。其心或生或復不生。謂根破壞故。境不現前故。闕作意故。未得故。相違故。已斷

故已滅故。已生故。心不得生。由此相違諸因緣故。心乃得生。此中若具生因緣故。心便得生。名有心地。若遇不生心因緣故。心則不生。名無心地。

分位建立者。謂除六位。當知所餘名有心地。何等爲六。謂無心睡眠位。無心悶絕位。無想定位。無想生位。滅盡定位。及無餘依涅槃界位。如是六位。名無心地。第一義建立者。謂唯無餘依涅槃界中。是無心地。何以故。於此界中。阿賴耶識亦永滅故。所餘諸位轉識滅故。名無心地。阿賴耶識未永滅盡。於第一義非無心地。

本地分中聞所成地第十之一

已說有心無心地。云何聞所成地。謂若略說。於五明處。名句文身無量差別。覺慧爲先。聽聞領受。讀誦憶念。又於依止名身句身文身義中。無倒解了。如是名爲聞所成地。何等名五明處。謂內明處。醫方明處。因明處。聲明處。工業明處。

云何內明處。當知略說由四種相。一由事施設建立相。二由想差別施設建立相。三由攝聖教義相。四由佛教所應知處相。

云何事施設建立相。謂三種事總攝一切諸佛言教。

一素怛纜事。二毗奈耶事。三摩怛履迦事。如是三事攝事分中當廣分別。

云何想差別施設建立相。呴陀南曰。

句迷惑戲論。住真實淨妙寂靜性道理。

假施設現觀。

云何句。謂內六處無量境界。無量方所。無量時分。復有三界。謂欲界。色界。無色界。又有三界。謂小千世界。中千世界。三千大千世界。復有四眾。謂在家眾。出家眾。鄖波索迦眾。非人眾。復有三受。謂苦受。樂受。不苦不樂受。復有三世。謂過去世。未來世。現在世。復有三

寶。謂佛寶。法寶。僧寶。復有三法。謂善法。不善法。無記法。復有三雜染。謂煩惱雜染。業雜染。生雜染。復有四聖諦。謂苦聖諦。集聖諦。滅聖諦。道聖諦。復有九次第等至。謂初靜慮等至。乃至滅想受等至。復有三十七菩提分法。謂四念住。四正斷。四神足。五根。五力。七覺支。八道支。復有四沙門果。謂預流果。一來果。不還果。最勝阿羅漢果。復有眾多勝妙功德。謂無量解脫勝處。偏處。無諍願智。無礙解。六神通等。復有方廣大乘五事。謂相。名。分別。真如。正智。復有二空性。謂補特伽羅空性。及法空性。復有二無我性。謂補特伽羅無我。

性及法無我性。復有遠離二邊處中觀行。謂離增益邊離損減邊。復有四種真實。謂世間所成真實道理。所成真實煩惱障淨智所行真實。所知障淨智所行真實。復有四尋思。謂名尋思。事尋思。自性假立尋思。差別假立尋思。復有四如實徧智。謂名尋思所引。如實徧智。事尋思所引。如實徧智。自性假立尋思所引。如實徧智。差別假立尋思所引。如實徧智。復有三種自性。謂徧計所執自性。依他起自性。圓成實自性。復有三無性。性謂相無性。性生無性。性勝義無性。復有五相大菩提。謂自性故。功能故。方便故。轉故。還故。

復有五種大乘。一種子。二趣入。三次第四正行。五正行果。最初發心。悲愍有情。波羅密多。攝眾生事。自他相續成熟。復有五無量想。謂有情界無量想。世界無量想法界無量想。所調伏界無量想。調伏方便界無量想。復有真實義隨至。謂於一切無量法中。徧隨至真。如及於彼智。復有不思議威德勝解無障礙智。三十二大士夫相。八十種隨形相。四種一切相清淨。十力。四無所畏。三念住。三不護。大悲無忘失法。拔除習氣。一切相妙智等。如是諸句。略唯二句。謂聲聞乘中。所說句。及大乘中所說句。云何迷惑。謂四顛倒。一於

無常計。常顛倒。二於苦計。樂顛倒。三於不淨計。淨顛倒。四於無我計。我顛倒。云何戲論。謂一切煩惱及雜真如。及四聖諦。云何淨。謂三清淨性。一自體清淨性。二境界清淨性。三分位清淨性。云何妙。謂佛法僧寶。名最微妙。墮最第一施設中故。云何寂靜。謂從善法欲。乃至一切菩提分法。及所得果。皆名寂靜。云何性。謂諸法體相。若自相。若共相。若假立相。若因相。若果相。等。云何道理。謂諸緣起及四道理。云何假施設。謂於唯法假立補特伽羅。及於唯相假立諸法。云何現。

觀謂六種現觀。如有尋有伺地已說。復次喫柁南曰。
方所位分別。作執持增減。冥言所覺上。
遠離轉藏護。

云何方所。謂色蘊。云何位。謂受蘊。云何分別。謂想蘊。云何作。謂行蘊。云何執持。謂識蘊。云何增。謂有二種。一煩惱增。二業增。如增有二種。當知減亦爾。云何冥。謂無明及疑。云何言。謂諸如來十二分教。說名爲言。云何所覺。謂彼言音所說之義。名爲所覺。云何上。謂四沙門果。云何遠離。謂五種遠離。一惡行遠離。二欲遠離。三資具遠離。四憤恚遠離。五煩惱遠離。云何。

轉謂三界五趣。云何藏護。謂追戀過去。希慕未來。耽著現在。復次喩柁南曰。

思擇與現行。睡眠及相屬。諸相攝。相應。說住持次第。

云何思擇。謂一行順前句。順後句。四句無事句。復有色法。無色法。有見法。無見法。有對法。無對法。有漏法。無漏法。有爲法。無爲法。有諍法。無諍法。有味著法。無味著法。依耽嗜法。依出離法。世間法。出世間法。有繫屬法。無繫屬法。內法。外法。麤法。細法。劣法。勝法。遠法。近法。有所緣法。無所緣法。相應法。不相應法。有行

法。無行法。有依法。無依法。因法。非因法。果法。非果法。異熟法。非異熟法。有因法。非有因法。有果法。非有果法。有異熟法。非有異熟法。有執受法。無執受法。大種造法。非大種造法。同分法。彼同分法。有上法。無上法。又有過去法。未來法。現在法。善法。不善法。無記法。欲繫法。色繫法。無色繫法。學法。無學法。非學非無學法。見所斷法。修所斷法。無斷法。又有四緣。謂因緣。等無間緣。所緣緣。增上緣。又有四依。一法是依。非補特伽羅。二義是依。非文。三了義經是依。非不了義。四智是依。非識。又有四無量法。四念住法。四正斷法。四神足。

法。五根法。五力法。七覺支法。八支聖道法。四行跡法。
四法跡法。奢摩他法。毗鉢舍那法。增上戒法。增上心
法。增上慧法。解脫法。勝處法。偏處法。如是等法。無量
無邊應當思擇。云何現行。謂諸煩惱纏。云何睡眠。謂
諸煩惱隨眠。云何相屬。謂內六處。於一身中。當知展
轉互相繫屬。又若此法能引彼法。當知此彼互相繫
屬。又諸根境。當知能取所取。互相繫屬。云何攝。謂十
六種攝。一界攝。二相攝。三種類攝。四分位攝。五不相
離攝。六時攝。七方攝。八一分攝。九具分攝。十勝義攝。
十一蘊攝。十二界攝。十三處攝。十四緣起攝。十五處

非處攝。十六根攝。云何相應。當知此相略有五種。一
與他性相應。非自性。二於他性中。與不相違相應。非
相違。三於不相違中。轉中上品與轉中上品自相應。
非餘品。四於轉中上品中。同時相應。非異時。五於同
時中。同地相應。非異地。云何說。謂四種言說。一見言
說。二聞言說。三覺言說。四知言說。云何住持。謂四食。
一段食。二觸食。三意食。四識食。云何次第。謂六種
次第。一流轉次第。二成所作次第。三宣說次第。四生
起次第。五現觀次第。六等至次第。復次第。喫柁南曰。
所作及所緣。亦瑜伽止觀。作意與教授。

德菩提聖教

云何所作。謂八種所作。一滅依止。二轉依止。三偏知所緣。四喜樂所緣。五得果。六離欲。七轉根。八引發神通。云何所緣。謂四種所緣。一偏滿所緣。二淨行所緣。三善巧所緣。四淨煩惱所緣。云何瑜伽。謂或四種。或九種。四種瑜伽者。一信。二欲。三精進。四方便。九種瑜伽者。一世間道。二出世道。三方便道。四無間道。五解脫道。六勝進道。七輶品道。八中品道。九上品道。云何止。謂九種住心。云何觀。謂或三事觀。或四行觀。或六事差別所緣觀。三事觀者。一有相觀。二尋求觀。三伺察觀。四行觀者。謂於諸法中簡擇行觀。極簡擇行觀。徧尋思行觀。徧伺察行觀。六事差別所緣觀者。一義所緣觀。二事所緣觀。三相所緣觀。四品所緣觀。五時所緣觀。六道理所緣觀。云何作意。謂七種作意。了相等如前說。云何教授。謂五種教授。一教教授。二證教授。三次第教授。四無倒教授。五神變教授。云何德。謂無量解脫等。如句中已說。云何菩提。謂三種菩提。一聲聞菩提。二獨覺菩提。三阿耨多羅三藐三菩提。云何聖教。謂授以歸依。制立學處。施設說聽。建立師徒。施論戒論。生天之論。詞欲愛味。示欲過失。顯說雜染。

及清淨法。教導出離及與遠離。稱讚功德。乃至廣說無量無邊清淨品法。

云何攝聖教義相。此中有能修習法。謂於諸善法專志所作。相續所作。方便勤修。有所修習法。謂所有諸善法。有有過患法。謂應偏知法。有有染汙法。謂應不著制伏。初應斷法。有障礙法。謂違逆現觀究竟法。有隨順法。謂隨順現觀究竟法。有真如所攝法。謂應覺悟法。有勝德所攝法。謂所應引發法。有隨順世間法。謂應習應斷及斷已現行法。有得究竟法。謂究竟自義所應證法。

云何佛教所應知處。相當知此中一切有情住有三種。謂日別住。盡壽住。善法可愛生展轉住。初由食增上力。第二由命行增上力。第三由於諸善法不放逸增上力。於諸不善無記法中亦有相似不放逸法。對於殺生等事及威儀工巧等中審諦而作。然於善法不放逸者。於現法中乃至能得般涅槃故。於後法中往善趣故。多有所作。

復次依有情世間及器世間。有二種法能攝一切諸戲論事。謂能取法。及彼所依所取之法。又諸世間略。有二種雜染根本能引無義無利雜染。謂於真實無

正解行及彼爲先希求無義。又正法外。若諸沙門。若婆羅門。略有二種雜染根本。謂薩迦耶見增上力故。推求我常。推求我斷。又諸有情。略有二種眾苦根本。謂於有漏法喜愛俱行。所有期願。及非理所引厭離俱行。所有期願。又有二種師及弟子教授教誡相違之法。謂諸弟子不能堪忍教誨語言。及師倒見習邪行。與此相違當知即是白品二法。又有二法。甚能違越世出世間正行境界。謂於自非法增上所生不可愛果。無有顧慮。於所作罪無有羞恥。及於現法他所殺縛衰退等事。無有顧慮。於所作罪無有羞恥。與

令根熟補特伽羅速證通慧。一於教授教誠遠離詭
誑。二厭離爲先。身語意行離諸調戲。又有二法。令居
一處同梵行者。展轉皆得安樂而住。一者堪忍他所
逼惱。二者自不逼惱於他。又有二法。令居一處同梵
行者。未生違諍。遮令不生。其已生者。速令止息。無鬪
無訟。無諍無競。一者展轉互起慈心。二者平等受用
財法。又有二法。速令心住得三摩地。清淨梵行。一者
憶持久遠所作所說增上力故。若有所犯。如法悔除。
若無所犯。便生歡喜。晝夜隨學。嘗無懈廢。二者於身
語意一切事業。能正了知增上力故。於諸過失。終無

違犯。由此因緣亦無憂悔。隨生歡喜。廣說乃至解脫
知見。又有二法。能越眾苦。謂能超越諸惡趣苦。及能
超越生死大苦。一者深見現法當來諸過患故。遠離
惡行。二者心常安定。精勤修習菩提分法。又有二法。
能令修斷居遠離者得安樂住。一者於諸境界不生
雜染。無惡尋伺擾亂其心。二者凡所噉食。要爲利益。
稱量消化。能隨順斷。令身調適。又有二法。令修善品
諸苾芻等時無虛度。一者於諸根境。正勤方便。研究
法相。二者知時知量。少習睡眠。又有二法。能壞增上
心學慧學。一者建立邪學。違越正學。及懷猶豫。二者

增益損減邪。見決定與此相違。當知卽是白品二法。又有二法能令已集菩提資糧。未入現觀補特伽羅。速入現觀。一者思惟現在過去。自他衰盛。二者勤修。諦行所攝無倒作意。又有二法令觀行者最極究竟。離垢梵行速得圓滿。一者修諦現觀。二者於後離欲方便勤修。於諸等至無有愛味。離諸障難。又有二法令觀行者速能引發世出世間一切勝德。一者九相住心。二者由六種事以正定心思擇諸法。如聲聞地當廣分別。又觀行者有二種淨。謂作意淨及所依淨。於三世中遠離愚癡智清淨故。名作意淨。遠離三界。

諸煩惱品麤重法故。名所依淨。又有二法心善解脫。諸阿羅漢內自所證。一者於現法中苦因永盡。二者由此爲先。當來世苦畢竟不生。

瑜伽師地論卷第十三

音釋

串

古患切
與慣同

素怛纜

此云
契經